

楞伽經 概略

所言楞伽經者，乃諸佛心量之玄樞，群經理窟之妙鍵，廣喻幽旨，洞明深義，不生不滅，非有非無，絕去來之二途，離斷常之雙執，以第一義諦，得最上妙珍，體諸法之皆虛，知前境之如幻，混假既息，識浪方澄，三自性(遍計、緣起、圓成)皆空，二無我(人、法)俱泯，入如來藏，遊解脫之門。人之一真不滅之性，而生死去來於天地之間，其為世數，雖折天下之草木以為籌箸，不能算之矣！佛之所說經，總十二部，而其多至五千卷，方其正法流行之時，人有聞半偈或得一句而悟入者，不計其數，至像法、末法之後，去聖既遙，人始溺於文字，有入海算沙之困，而於一真之體，遂漫不省解，於是有祖師出焉，直指人心，見性成佛，為教外別傳，於動容發語之頃，上根利器之人，已目擊而得之矣，由於去佛之演說，而謂之禪，離義而謂之玄，故由佛顯說而學者，必詆禪而諱義，然亦必宗玄，二家之徒相非而不知互相為用，且禪者度之一，豈異於佛哉，禪出於佛而玄出於義，不以佛廢禪，不以玄廢義，則其近之矣！(經文)佛在大海濱摩羅山頂楞伽城中作是言，昔諸如來，皆於此城說自所得，聖智証法，非諸外道臆度邪見，及以二乘修行境界，我今亦當為羅婆那王(楞伽王)開示此法。爾時羅婆那夜叉王，以佛神力，遙聞佛音，知如來從龍宮出，梵釋讚世天龍圍遶，見海波浪，觀其象會，藏識大海，境界風動，轉識浪起，發歡喜心，於其城中，高聲唱言，我當詣佛，請入此城，令我及與諸天世人，於長夜中得大饒益。佛告楞伽王，過去世中，諸大導師，咸哀愍汝，受汝勸請，詣室山中，說自証法，未來諸佛亦復如是，此是修行甚深觀行，現法樂者之所住處，我及諸菩薩，哀愍汝故，受汝所請，作是語已，默然而住。時楞伽王施奉種種上妙供養，復更供養大慧菩薩，請大慧菩薩當机，問法於佛，一切如來自証境界甚深之法。爾時佛以神通力，於彼山中，更化無量宝山，一一山上皆現佛身，一一佛前皆有楞伽王及其眷屬象會，一一皆有大慧菩薩而與請問，佛為開示自証智境，以百千妙音說此經已，佛及諸菩薩皆於空中隱而不現，楞伽王唯自見身，住本宮中，作是思惟，向者是誰，誰聽其說，所見何物，是誰能見，佛及國城，象寶山林，如是等物，今何所在，為夢所作，為幻所成，為復猶如乾闥婆城(化城)為翳所見，為炎所惑，為如夢中，石女生子，為如煙焰旋火輪耶，復更思惟，一切諸法，性皆如是，唯是自心，分別境界，凡夫迷惑，不能解了，無有能見，亦無所見，無有能說，亦無所說，見佛聞法，皆是分別，如何所見，不能見佛，不起分別，是則能見，時楞伽王，尋即開悟，離諸雜染，証唯自心，住無分別，往昔所種善根力故，於一切法，得如實見，不隨他悟，能以自智，善巧觀察，永離一切臆度邪解，住大修行，為修行師，現種種身，善達方便，巧知諸地上增進相，常樂遠離心，慧意識，斷三續見(一、世界相續=由眾生之有業而國土世界安立 二、眾生相續=五蘊法和合而眾生存立 三、業果相續=依善惡之業因而果報成之)離外道執著，內自覺悟入如來藏，趣於佛地。諸修行者應如是學，應如是見，永離心慧意識，莫著外見。佛言，觀一切法皆無自性，如空中雲，如水中月，如夢所見，不離自心，由無始來，虛妄見故，取以為外，作是觀已，斷分別緣，亦離妄心所取名義，知身及物並所住處，一切皆是藏識境界，無能所取及生住滅，如是思惟恒住不捨，不久當得生死涅槃二種平等，大悲方便，無功用行，觀諸眾生如幻如影，從緣而起，知一切境界，離心無得，行無相道，漸昇諸地，住三昧境，了達三界皆唯自心，得如幻定，絕象影像，成就智慧，証無生法，入金剛喻三昧，當得佛身，恒住如如，起諸變化，力通自在。欲得佛身，應當遠離，蘊界心，因緣所作，生住滅法，戲論分別，但住心量，觀察三有，無始時來，妄習所起，思惟佛地，無相無生，自証聖法，得心自在，無功用行，如如意寶，隨宜現身，令達唯心，漸入諸地... 佛言，大慧，有一類外道，見一切法隨因而盡，生分別解，想兔無角，起於無見，如兔角無，一切諸法，悉亦如是，執兔無角，於此而生，牛有角想，大慧，彼墮二見，不了唯心，但於自心，增長分別身及資生，器世間等，一切皆唯分別所現，應知兔角離於有無，諸法悉然，勿生分別，云何兔角離於有無，互因待故，分析牛角，乃至微塵，求其體相，終不可得，聖智所行，遠離彼見，是故於此不立分別，大慧問佛，世尊，彼豈不以妄見起相，比度觀待，妄計無耶，佛言，不以分別起，相待以言無，何以故，彼以分別為生因故，以角分別為其所依，所依為因，離異不異，非由相待顯兔角無，大慧，若此分別，異兔角者，則非角因，若不異者，因彼而起，大慧，分析牛角，乃至極微，求不可得，異於有角，言無角者，如是分別，決定非理，二俱非有，誰待於誰，若相待不成，待於有故，言兔角無，不立分別，不正因故，有無論

者。執有執無。二俱不成。大慧。復有外道。見色形狀。虛空分齊。而生執著。言色異虛空。起於分別。大慧。虛空是色。隨入色種。色是虛空。能持所持。建立性故。色空分齊。應如是知。大慧。大種生時。自相各別。不住虛空中。非彼無虛空。兔角亦爾。觀待牛角。言彼角無。分析牛角乃至微塵。又析彼塵。其相不現。彼何所待而言無耶。若待餘物。彼亦如是。大慧。汝亦遠離兔角牛角。虛空及色。所有分別。汝及菩薩。亦常觀察。自心所見分別之相。於一切國土。為諸佛子說。觀察自心修行之法。大慧菩薩復請佛言。願為我說。具修行法。佛言。菩薩具四種法。成大修行。何謂為四。謂觀察自心所現。遠離生住滅見。善知外法無性。專求自証聖智。若諸菩薩成此四法。則得名為大修行者。大慧。云何觀察自心所現。謂觀三界唯是自心。離我我所。無動作無去來。無始執著。過習所熏。三界種種色行名言。繫縛身資。所住分別。隨入之所顯現。菩薩如是觀察自心所現。大慧。云何得離生住滅見。所謂觀一切法如幻夢生。自他及俱。皆不生故。隨自心量之所現故。見外物無有故。見諸識不起故。及眾緣無積故。分別因緣起三界故。如是觀時。若內若外。一切諸法皆不可得。知無自性。遠離生見。証如幻性。即時速得無生法忍。住第八地(不動地)了心意意識五法(名相分別。如四時自性。二無我(人法)境。轉所依止。獲意生身。大慧言。世尊。以何因緣名意生身。佛言。意生身者。譬如意去。速疾無碍。名意生身。大慧。譬如心意。於無量百千由旬之外。憶先所見種種諸物。念念相續。疾詣於彼。非是其身。及山河石壁。所能為碍。意生身者。亦復如是。如幻三昧。力通自在。諸相莊嚴。憶本成就眾生願故。猶如意去。生於一切諸聖眾中。是名菩薩得遠離於生住滅見。大慧。云何觀察外法無性。謂觀察一切法。如陽焰。如夢境。無始戲論種種執著。虛妄愚習為其因故。如是觀察一切法時。即是專求自証聖智。大慧。是名菩薩具四種法。成大修行。汝亦如是。勤加修學。大慧復白佛言。世尊。願為我說。言說分別。相心法門。我及諸菩薩善知此故。通達能說所說二義。疾得無上菩提。令一切眾生於二義中。而得清淨。佛言。大慧。有四種言說分別相。所謂相言說。夢言說。計著過惡言說。無始妄想言說。大慧。相言說者。所謂執著自分別色相生。夢言說者。謂夢先所經境界。覺已憶念。依不實境生。計著過惡言說者。謂憶念怨仇先所作業生。無始妄想言說者。以無始戲論妄執習氣生。是為四。大慧復言。世尊。願更為說。言語分別所行之相。何如。何因。云何而起。佛言。大慧。依頭胸喉鼻唇齒舌和合而起。大慧復言。世尊。言語分別為異不異。佛言。非異非不異。何以故。分別為因。起言語故。若異者。分別不為因。若不異者。語言不顯義。是故非異非不異。大慧復言。世尊。為言語是第一義。為所說是第一義。佛告大慧。非言語是。亦非所說。何以故。第一義者是聖樂。因言而入。非即是言。第一義者是聖智內自証境。非言語分別智境。言語分別不能顯示。大慧。言語者。起滅動搖展轉。因緣生。若展轉緣生。於第一義不能顯示。第一義者。無自他相。言語有相。不能顯示。第一義者。但唯自心。種種外相。悉皆無有。言語分別不能顯示。是故大慧。應當遠離言語分別。大慧復白佛言。世尊。何者為五無間業。若人作。已墮阿鼻獄。佛言。諱聽(拋開凡俗的見解。佛講這一段是修道最重要的法門)當為汝說。大慧言。唯。佛告大慧。五無間者。所謂殺母殺父。殺阿羅漢。破和合僧。懷惡逆心。出佛身血。大慧。何者為眾生母。謂引生愛與貪喜俱。如母養育。何者為父。所謂無明。令生六如聚落中故(六道)斷=根本。名殺父母。云何殺阿羅漢。謂隨眠為怨(隨眠=貪瞋痴慢疑我見等煩惱。隨逐有情而不離。故曰隨。有情隨逐而增昏滯。如睡眠。諸惑種子。隨逐於人。諸煩惱之體。幽微而難知。猶如睡眠狀。眠伏於阿賴耶識中。故曰隨眠)如鼠毒發。究竟斷彼。名殺阿羅漢。云何破和合僧。謂諸蘊異相和合積聚(眾生於凡塵迷真逐妄。所蘊集的業因)究竟斷彼。名為破僧。云何惡心出佛身血。謂八識身。妄生思覺。見自心外。自相共相。以三解脫無漏惡心。究竟斷彼。八識身佛。名為惡心出佛身血。大慧。是為內五無間。若有作者。無間即得現証實法。大慧復白佛言。如世尊說。我於某夜成最正覺。乃至某夜當入涅槃。於其中間。不說一字。亦不已說。亦不當說。不說是佛說。世尊。依何密意作如是說。佛言。依=密法作如是說。謂自証法及本住法。云何自証法。謂諸佛所証。我亦同証。不增不減。証智所行。離言說相。離分別相。離名字相。云何本住法。謂法本性。如金等在鑛。若佛出世。若不出世。法住法位。法界法性。皆悉常住。大慧。譬如有人。行曠野中。見向古城。平坦舊道。即便隨入。止息遊戲。大慧。於汝意。云何。彼作是道。及以城中。種種物耶。大慧言。不也。佛言。我及諸佛所証真如。常住法性。亦復如是。是故說言。始從成佛。乃至涅槃。於其中間。不說一字。亦不已說。亦不當說。大慧問。虛妄分別云何而生。佛言。一切眾生。於種種境。不能了達自心所現。計能所取。虛妄執著。起諸分別。墮有無見。計著於我。及以我所。名虛妄分別。觀諸有為法。離能緣所緣。決定唯是心。故我談心量。量之自性。緣法=俱離。究竟妙淨事。我談名心量。真如空實際。